

■ Baionako Credit-Lyonnaiseko langileak greban ziren atzo

BAIONAKO Credit Lyonnais banketxeko langileen % 90 greban izan ziren atzo egun osoan, Parisko zuzendaritzak erabaki duen 5.500 langileren kanporatzea salatzeko. CFDT eta CGT sindikatuak deiturik, ordezkariak zuzendaritzarekin bildu ziren, baina haren erantzun bakarra «grebak kalte gehiago» sortzen duela izan zen. Zuzendaritzaren «itxitasunaren» aitzinean, Ipar Euskal Herrian arriskuan dauden 136 lanpostuak salbatzeko mobilizapenak Landako eta Biarnoko langileekin batera koordinatuko dituzte indar handiagoa hartzeko. Ildo horretatik, bigarren mobilizapen eguna heldu den uztailaren 9rako finkatu dute. X

■ Aldi Baterako Lan Enpresetan kontratatzea leporatu diote Kutzari langileek

DUELA BI URTEKO hitzarmenean lantaldea berritu eta enpleguak sortzeko akordioa izenpetu zuten Kutzako langileek eta zuzendaritzak. Behin-behineko kontratuen ordez beste kontratu egonkorragoak egingo zituztela hitzartu zuten orduan, langile batzordeko ordezkariak prentsa agiri batean zabaldu dutenez. Alabaina, zuzendaritzak ez du hitzarmena bete eta «uda honetan, zerbitzua hobetzeko Aldi Baterako Lan Enpresetara» joko du Kutzak. ABLEen bidez egindako kontratuek bezeroei ematen zaien zerbitzuaren kalitatea jaitsi egiten dutela salatu dute langileek eta kalitatezko enplegua sortzeko eskatu dute. Horrelako jokaerak ulertezinak dira langileen ustez, batik bat «iaz Kutzak 15.000 milioi pezetaren mozkinak jaso» zituela kontuan izanda. X

■ 'Carreira'-ko arrantzaleen senitartekoek 60 milioi pezetaren kalteordaina jasoko dute

ATZO EGUERDIAN jaso zuten Carreira Pasaiaiko arrantzontziko arrantzaleen senitartekoek aseguru etxeek emandako kalteordaina. Orotara, 60 milioi pezeta jaso zituzten itsasoan urte hasieran desagertutako 11 arrantzaleen familiek. «Kalteordaina eskutan izatea miraria da, askotan bitarteko tramiteak urtetan luzatzen baitira», adierazi du Jaime Tejedorrek, Pasaiaiko kofradien presidentek. Aseguru etxeetako ordezkariak zera esan dute: «Ahaleginak egin ditugu ahalik eta azkarren ordaindu ahal izateko eta tragediaren atsekabea ahal den neurrian arintzeko». X

■ Gobernuak Bruselan presio egin behar dute bolanta sareak debekatzeko, Greenpeace ustez

BOLANTA SAREEN behin-betiko debekua lortzeko Europako Batasunean presio egin dezaten eskatu die Greenpeacek gobernuari. Herenegun bertan bolanta sareetan harrapatuta katxalote handi bat hilda agertu zen Balear irltako itsasertzean. Horrez gainera, joan den astean beste hiru katxalote sare artean hilda agertu direla salatu du talde ekologistak. Mediterraneoan dabilzan Italiako arrantzontziek ez dutela sareen gehieneko luzera errespetatzen uste du Greenpeacek. Kataluniako eta Balear irltako arduradun politikoek ere bat egin dute nazioarteko ekologista taldearen salaketekin. X

■ Kantabria, Gaztela-Leon eta Errioxa errekurtsuak prestatzen ari dira

ELKARTEEN gaineko Zerga erreformatzeko EAEko diputazioek onarturiko arauen aurkako errekurtsuak prestatzen dihardute Gaztela-Leon, Kantabria eta Errioxako gobernuak. Komunitate hauetako agintariak iragarria dute dagoeneko auzibidera jotzeko asmoa. Kantabriako PPko gobernuak ez du erabaki oraindik Auzitegi Konstituzionalera joko duen ala errekurtsu kontentzioso-administratiboa aurkeztuko duen. Errioxan ere, alderdi bereko Gobernuak ekimena aztertzen ari da, eta Gaztela-Leongoa beste horrenbeste egiteko asmoa iragarri du. Eusko Jaurlaritzako eta haziendetako arduradunek, berriz, ez dute batere kezkarik agertu errekurtsu hauez, eta euskal erakundeek zerga horren gaineko erabateko konpetentzia dutela gogoratu dute. Bizkaiko eta Gipuzkoako Biltzar Nagusiek onarturik, Arabako Hazienda Batzordeak atzo onetsi zuen araua eta ostiralean herrialde honetako Biltzar Nagusiek egingo dute. X

■ Udal eta diputazioetako funtzionarioentzat % 4ko soldata igoera

UDALETAKO ETA DIPUTAZIOETAKO langileen hitzarmen kolektiboa (Arcepafe) sinatzeko ados jarri ziren iragan astean erakundeak eta sindikatuak. ELAk eta CCOOK jakinarazi dutenez, hitzarmenak % 4ko soldata igoera eta 10.000 pezetako igoera lineala jasotzen ditu. EAEko sektore publikoko 20.000 funtzionarioen lan baldintzak arautzen dituen hitzarmena Eudel-ek (Euskal Udalen Elkarteak) eta Bizkaiko nahiz Gipuzkoako diputazioek sinatu dute erakundeen aldetik —Arabakoak ez baitu sinatu— eta ELA, CCOO, UGT eta LAB sindikatuak langileak ordezkatuz. Azken hauen arabera, hitzarmenari esker langileak berreskuratu ahaliko dute galdutako eros-ahalmena, urteko lanaldia bi ordutan murriztuko dute eta aldi baterako enpresen jarduera mugatu egingo dute. X

Volkswagenen oraindik ez dira ados jarri lanaren banaketaz

Zuzendaritzakoak eta sindikatuak berriro bilduko dira gaur



Volkswagenen planta, Landabenen.

JOXE LACALLE

Nafarroako Volkswagenen lana banatzeko formulak ari dira aztertzen langilerik ez kanporatzeko. Langileen ordezkariak bi baldintza jarri dituzte lanaren banaketa onartzeko: aldi baterako langile guztiei behin-betiko kontratua egitea eta lanordu estrak erabat kentzea.

Erredakzioa / Iruñea

VOLKSWAGENEKO langileen ordezkariak baikor samar zeuden atzo goizean, arratsaldean egitekoak ziren bileran aurreakordioaren bat lortuko zutelakoan. Bileraren ondotik, berriz, zuhurrago mintzatu ziren, zuzendaritzak aurkeztu zien proposamenak ez omen zeukalako zeriak handirik beraienarekin. «Alde handia dago bi proposame-

nen artean. Guk lanaren banaketa erdibana ordaintzea proposatu dugu, baina ez dirudi zuzendaritza horretarako prest dagoenik», adierazi zuen langile batzordeko kide batek. Hala eta guztiz ere, zuzendaritzaren proposamena aztertu eta gaur goizean berriro biltzekotan gelditu ziren.

Nafarroako Volkswagenek % 10 gutxitu behar du produktzioa. Alemaniatik jasotako aginduak ustekabearen harrapatu zituen Iruñeko lantegiko zuzendaritza eta langileak. Hori lan-gilerik kanporatu gabe gutxitu nahi dute produktzioa, produktzio murrizketak ahalik eta eragin txikiena izan dezan langileengan. Hori dela eta, lana banatzeko formulak aztertzen ari dira.

Langileek bi baldintza jarri dizkiote zuzendaritzari lanaren banaketa onartzeko: behin-behineko langile guztiei (400 inguru) behin-betiko kontratuak egitea eta lanordu estrak erabat ken-

tzeta (Nafarroako Volkswagenek 2.000 milioi pezeta ordaindu zituen iaz lanordu estrengatik). Trukean ostiral gaueko txanda utziko lukete eta, beharrezkoa izanez gero, baita gainontzeko gaueko txanda guztiak ere. Langileek, baina, ez diote uko egin nahi ostiral gaueko txandagatik dagoen soldata zatiari: soldata eta antzinasuna eskatzen dute, plusik gabe. Zuzendaritza ez dator bat puntu horretan: ostiral gaueko txanda kentzekotan ez du sosik ordaindu nahi. Lanaren banaketa enplegu erregulazio gisa planteatu nahi du, soldatak murriztuta.

Volkswageneko negoziaketak agerian utzi ditu azkenaldian hain modako jarri den lan banaketak dakartzan zailtasunak. Zuzendaritzak lan banaketa eta soldata murrizketa lotuta doa-zela dio. Sindikatuak, berriz, lotu beharrekoak lan banaketa eta aberastasunaren banaketa direla uste dute. X

AHV gaur hasiko da instalazio nagusiak ixten, 100 urteko historia ere bukatuz

Geratzen diren langileak erregulazioan sartuko dira oporren ostean

J. Aiarza / Bilbo

AHV-K ehun urteko historia itxi-ko du gaurtik datozen egunetara. Sestaoko azken labe garaia itzali eta Ansoiko (Barakaldon kokatutakoa) laminazio trenaren gelditu egingo dira behin-betiko. Bizkaiko Altzairutegi Trinkoak (ACB) AHVren instalazio hauek utzitako lekukoa hartuko du berehalakoan.

AHVko azken labea, enpresak eduki zituen hiruretatik nagusia,

bihar edo etzi itzaliko da behin-betiko. Ansoiko azken bobina, berriz, hilaren 20an aterako da bertako laminazio trenetik. Horrela amaituko da AHVko erailpen prozesua eta ehun urteko historia.

Laminazio trenak ez dio betiko agur esango altzairugintzari, ordea, Indiako NFCL instalazio hauek CSIn erosi dizkiolako. Salerosketa tratuaeren arabera, teknikariak makina hauen funtzionamendua ikasi eta gero,

Indiako konpainiak lurralde hartara eramango ditu lanean jarraitzeko.

Enpresako iturriek adierazi dutenez, AHVko instalazio nagusietan oraindik lanean ari diren langileak (1.900 inguru) enplegu erregulazioan sartuko dira oporren ostean. Langile hauek aldez aurreko erretiroa hartu, saritutako bajak onartu, CSIn beste lantegietan sartu edo lanpostu alternatiboak eskuratuko dituzte. X